

雲

山

日

記

元郭退思椽史雲山日記序

自來一鄉一邑之中先輩之嘉言懿行足稱鄉先生者代不數人或以事業或以著撰或以翰墨代愈遠見愈難不過存十一於千百而流風餘韻猶使人景仰於丰采之間觀感於意言之表曠百世而如相接焉然流傳既艱散佚尤易豈不賴後賢掇拾之補苴之傳播之得以閱千百載而永存哉丹徒郭天錫先生手書日記一冊安邑宋芝山跋云自至大元年戊申八月廿七日訖二年己酉十月三日止并閏月閱月十六逐日詳書天氣之陰晴寒暑人事之往來酬答所尤詳者飲酒必書求書畫必書觀書畫必書游寺觀必書稱謂之間褒譏寓焉感歎之際義理昭焉細觀一過如見其人之性情心事而與之周旋談笑於十有六月之久也芝山此跋真

能傳日記之精神而誌其勝槩鮑刻客杭日記非全文也陳君善餘得之杭州重以鄉先生之翰墨付梓以永其傳天錫美鬚髯人稱郭髯書仿趙松雪畫師高房山名大顯於元中葉而其子啟所編之快雪齋集俞希魯所序者業已久佚卽此日記一冊人亦重其墨迹輾轉傳鈔不如墨板得以廣布先生生於前至元歿於後至元朝貴尊崇文名洋溢而睹西番之塔時深易代之悲讀玉殿之詩不免故宮之恨未經桑海猶慨荆駝何耶善餘並爲考其年略搜其詩文以附益之藉以示後之學者深仰止之思焉近時錢塘丁氏有武林掌故之編常州盛氏有先哲遺書之輯善餘搜尋鄉土紀載業已刊行數種使一鄉一邑均有人能爲廣續俾見遺書大出一埽前人錮蔽之習眞所謂守先以待後者其在斯乎癸丑

正月試燈日江陰繆荃孫序於海上之書連屋

雲山日記卷上

元 京口 郭昇 天錫

二十七日晴餘熱 李行簡來 爲真空叟作墨竹一枝頗
奇 毛國華秀才自常州來見 俞用中張仲方趙茂元
來 盛季高來閑坐久之 見徐生不遇 回毛兄禮
二十八日 早雨止晚稻菜豆之類得濟 鄭翔遠來 陳
和甫來

二十九日陰 葉子華來

至大元年戊申九月初一日 早到路學同知拜殿諸官先
散王教亦追逐而去遂請住投公牒爲梅保蕭學司事公
堂對眾亦以乃事白之眾人及陳學正 燒壽星紙 拜
親 訪何德甫 次見余慶餘會胡山齋戴居雲蓋君玉

路遇趙茂元亦馬上行數十步遇雲谷顯舍人握手話
去年此日在邳州道中時相與一笑 堯子泰來值出
章君文來 孟宅取染

初二日雨 陳靜齋來 房晦叔續至坐頃葉子華來 陳
舍人來自沙閒沽酒待之 金壇催僕蔣興談新來 夜
雨

初三日雨 陳和父來錄示新文 小窗兀坐誦滿城風雨
近重陽之句誰其慰予岑寂耶 葉子華徐耐翁來
初四日雨晴 出見李提舉會李和之辛提舉康錄事 見
郭元吉不遇 見俞仲連會趙心甫 同謁陳直學 訪
章君文會周寬夫 訪陳君義 次見陳茂叔 見陳和
甫不遇 陳景南來同見房晦叔

初五日 陳和甫來 金壇催僕蔣興來分付鈕受二租
洪耆宿來 陳菊田來 邢竹埜來 王君鼎來 盧仲
益自沙閒來見 李仲謙一山之姪自常州來見 宗定
齋來 趙茂元來借印書板 甘露新古厓和尚來爲碑
事借鎮江志看 晚見王君鼎不遇

初六日晴 早回謁李仲謙 次過丹陽館前遇吳良臣
次到府中見王君鼎 盧生來求書弔挂十四幅 李仲
謙攜紙求書畫蘭房仲明亦求四幅 趙心甫俞用中張
仲方趙茂元來 同謁洪天錫 路遇孟君澤 訪陳君
義 過五條街遇東景南同訪陳響林出示小米手軸臨
伯時馬雪林行虎三老帖海公物也看畢同景南行至市
閒分路

初七日晴 侍親訪滿梅隰道錄說焦佑之謀道司令史
次訪徐耐翁會葉子華 次拉子華來舍下小勺 侍親
訪因勝寺昂鶴峯會真空叟鶴峯留酒麪僧司朱提控續
至 訪邢竹埜有客不復進

初八日晴 訪李提舉值出乃子行簡留茶會夾谷同知舍
人 回謁趙心甫山長會張仲方孟進之堯楊二小學教
諭 訪袁總領不遇 訪郭元吉會石剛中 回謁俞用
中不遇 葉子華來說周七郎錢事 常子正來陳茂叔
來值出 陳靜齋來

九月九晴 祀先 葉子華來小勺 邀徐將仕李四乙耶
午集 焦彥明來不曾相接章君文來 邢毅夫來

初十日晴 同三哥出見章子實不遇子實近歸自杭欲扣

一二事云 次登甘露寺見本無傳長老留酒午麪仍求
書放翁水調歌頭孫楚望摸魚子二詞于多景樓下壁上
又以紙求書遺教經四十二章經瀉山警策證道歌 林
生稜稍鋪具茶 訪湯景先 章子實來小勺 張泰齋
來值出

十一日晴 早上城隍廟問籤劉吉甫待湯 爲甘露寺長
老寫水陸堂并護法龍王牌

十二日晴 爲甘露本無傳長老鈔經客有惠杭州潘又新
筆者書小楷數千而不伐可愛可愛

十三日晴 邢毅夫來 湖州文端甫來同王趙二兄過訪
偶出不及迎肅 龔子中折簡相招晚勺會宜興岳仲遠
山長沈國良岳德敬趙心甫李奏差蒙古郭元靜岳舍人

楊以吾蓋諸人送子中閣中岳氏自鄉中來酒未盡以夜
禁而歸

十四日晴 早見文端甫不遇 問候青陽君輔 普照寺

前遇李和之 葉子華來 城隍祠卜籤吉 焦佑之來

王師善岳仲遠岳德敬楊以吾來 盛季高來值出

訪盛季高出示李重光墨竹鵲鵲希遠墨梅古木房仲明

同茶 次訪章子實

十五日晴 后伯玉房晦叔朱敬之來

十六日晴 送所寫遺教經還甘露長老 晚趁呂城夜航

作錢塘之行

十七日午前抵呂城壩下倒換小舟至奔牛復換小舟晡時
至常州入城元豐橋見白湛淵提舉值出江陰未回乃子

无咎次子无華留歇同白无咎到太平寺觀壁上畫水中
作一筆繞之不斷立視久之若洶湧生動之意奇筆也寺
僧具茶茶已乃出門外建新塔方成 晚二白兄具酒晚
飯宿于无華書院

十八日晴 早尋蔡德甫來說話无咎待早飯蔡兄同 无
咎偕馬同出訪馬習齋教授于郡學會龜山王山長劉練
江馬教仍約午集 同无咎回蔡德甫禮留小酌煮蟹蒸
芋 次訪李仲謙出門解后包古江山長赴馬習齋之約
坐客羅漢臣余及白无咎食五品酒散作別次别无咎昆
仲登夜航之姑蘇有北客喧呼至二更乃睡

十九日 午後抵平江見龔子敬山長父子留宿具晚飯飯
已留燈夜語是夜多蚊

二十日晴 早子敬以八月二十八日禮上學道書院山長
作武臨清提舉書張德輝外郎書趁余入杭之便 飯罷
登航解后杭人潘伯起呼酒酌之蓋在大都時曾相識故
也共上船行

二十一日 晡時上長安買飯

二十二日 四更到杭州城外霜月滿天寒氣逼人候北關
門接待寺鐘動換舟入城拂明潘伯起送予歇于施水坊
橋梳頭沈待詔之樓遇金壇尹子源同寓 橋東訪趙伯
可儲叔儀 打猪巷見李伯玉留茶話乃事 次到江浙
省中照磨所見李叔義 省西見張菊存下翼子敬書會
張松澗府判 到五房後見武臨清提舉會王一初周有
道二都目李教授及武公令似口口教授 歸寓所會吳

茂之 房主人具酒小飲余亦續酒 同茂之到長生老人橋見唐仲文新補廉吏不遇而還 過紀家橋解庫門首見吳若遺提點

二十三日客杭晴 早過井亭橋解后張雲心州判 次遇湯北村同知張景芳學正 到玄同觀見吳若遺若遺有他事令師孫羅康伯相接具早飯鄭表白同集柏窗鄭君之子也飯已入壺中林壑次開北斗殿看李息齋所畫松二株於壁間 是日郝左丞趙子昂方會而去欲見子昂未果 見李伯玉改所幹之文約來日于省中見其子

出北關門湖州市妙行寺中尋伏維那已于昨日登天目山矣徒有悵快寺僧宗兄供紙留數字而退觀正殿佛三尊偉甚中設毗盧遮那佛像前殿止有藏一座次入法堂

有碑石數本云喻彌陀神筆所畫佛像傍刻本末不暇記
也次禮古觀音像相傳唐朝塑者兩邊畫壁以屋暗不可
細覽門有放生池俗云接待寺者卽此院也回路足行倦
甚坐小舟而還 唐仲文李叔義來值出 趙伯可來
寓樓頗潔便于坐臥大抵杭城樓居相連自有一種風韻
耳 婺州孔君立來聞孔提舉新除 晚見唐仲文外郎
出示米老研山圖路遇王成之都目相與立談久之又遇
王壽之

二十四日晴 客杭 早到省中照磨所見李叔義改抹元
文 到儒學提舉司攜李兄書見王一初都目投呈子會
王壽之王子芳任伯和是日分付該吏金君玉承行 次
約金君玉毛令史市樓小集 雨作 湖上兜率寺見趙

子昂學士不遇乃姪趙仲美具茶訖致意

是日遇半學甫宗壽卿徐君美袁義甫楊廷秀丹徒宣差
狄仁卿田君美蔡宣使許芳所應旂

二十五日陰 客杭 早到省中見李叔義 次入禮房見
張德輝外郎話乃事 到提舉司催金君玉書卷王一初
未允 再到省中見李叔義託見王公 范成之主簿來
晚張德輝請說話會丘中山教授德輝檢尋解由未見
託爲挨問 見范成之 尹子源約小飲是夜客樓喧甚
必雨作也

二十六日陰 客杭 湯北村同其子君白來 張德輝來
到省中

辛巳好晨聚會禮房見張德輝德輝作書與王都目 見

張菊存會衢州鄭子實山長 到儒司不聚 結縛橋西
前洋街回謁湯北村同出訪張晴川次見崔進之回北村
具酒午麪浼書數紙屏稍高彥敬古松一株可愛窗外矮
橘數樹結子無數壓枝欲折若吾鄉則無此也飲散乃子
君白由大街轉歸 張菊存來 晚見張德輝 吳茂之
來值出 今日見北村說葛元白曹梅南戴祖禹金子仁
胡穆仲皆爲古人可惜再到杭城愈覺舊遊之落落也
客樓暄甚衣襟流汗借扇揮之

二十七日陰 寓杭 早到省中見李叔義 次到儒司見
周都目以官吏未允所請歸家寫狀再到省中見張德輝
德輝約晚來說話是日於省卷中檢尋學錄解由方見
晚晴登吳山下視杭城煙瓦鱗鱗莫辨處所左顧西湖右

俯浙江望故宮蒼莽獨見白塔屹立耳次謁伍子胥廟轉
至拱北樓卽朝天門行大街官巷而歸 茅山書院山長
赤盞象賢金壇教諭王竹所來茶罷同見趙伯可 見張
德輝改告省狀子會巳中山 趙伯可儲叔儀來 吳茂
之遣僕約來日早飯 尹子源相過夜話 路遇程鵬舉
二十八日晴 客杭 鄉人胡君用來 赴吳茂之早飯坐
客余及運司宋外郎廣平人也 訪王成之託見武公
訪湯北村 訪吾子行出所作無稽集皆戲談也 玄同
觀見趙子昂時郝左丞坐正席子昂問都下事 游開元
宮舊楊尉馬宮也深遠可愛正殿曰景命萬年之殿 見
鄭鵬南簽事留席坐客來僧錄事柯以善尹存庵劉耕莘
又一客及余共七人 晚見張德輝看省卷又作學錄教

諭擬倒矣託其宛轉未知可行否庖人幹事不料其相誤也 湯君白來值出 同謁赤蓋象賢不遇

二十九日客杭晴 早到省中見張德輝李叔義 訪王成之不遇 訪柯以善 再到省中禮房爲立擬劄事 到儒司司官不出獨吏輩兀坐司房而已 訪張景芳學正 訪張竹村書院觀諸公詩牌 湯君白來同游明慶寺看新塑佛像 次入廣化院 次游仙林寺寺中無可觀者相近一術士之女談星說命若懸水然 次與君白午飯君白具茶茶已自觀橋行至官巷而歸 吳若遺送魚麪果盤來 晚持魚果見德輝 朱良齋山長來 是日趙伯可歸湖溪就付景明書

三十日陰 客杭 早到省中禮房見張德輝李叔義是日

改正擬劄 次訪朱敬齋 湯北村遣乃子同李兄來求

字 到儒司見二都目催申狀會王成之 同君白出游

宗陽宮時裝塑未就 次游新宮佑聖觀看擁壁二十四

堵皆新畫也 路遇胡石塘主簿煎魚沽酒會尹子源沈

六郎 晚見德輝約來日到省中計會選本 晚雨喧甚

夜雨生寒

大德十一年二月十七日禮房呈前鎮江路儒學學錄郭界給由東奉省堂鈞旨連送還

房于學正山長內住用者

十月初一日雨 客杭城施水坊橋東岸沈氏樓 早冒雨

到省中 次見張德輝 雨中悶坐朱敬齋山長邀至其

家具小酌午翹翹已雨止 路遇莫知事蔣文甫

初二日雨終日 客杭 到省中付文書與選房以未照元

除又欲刁蹬張德輝宛轉言之 見李叔義 到儒司大

雨中止有武老兀坐廳上諸吏無來者 湯君白李君得
來算範圍數次同到官巷問茶茶已訪周君遠道士次到
君德家出子固墨戲開看看已分路各歸 晚尹子源招
飲沈六郎同集 子源爲財賦府吏求書

初三日又雨 客杭 到省中見李叔義 伺候也先伯提
控不出 到儒司二都目不出 同尹子源見儲叔儀留
小酌次同叔儀到子源寓樓開尊薦亥首 同子源到大
街問茶 次見沈誠之看翠雲子 次見唐仲文不遇
湯君白來 是日儒司緩慢吾事略發數語使之聞之
晚遇金君玉云王都目書卷矣 德清吳菊泉相過夜話
子源同問茶吳公至元二十七年赴北寫金字經者 省
東藥鋪遇張君遠

初四日乍晴 到儒司坐整日方得解子 解后陳無逸昆
仲 牟學甫吳茂之來值出 訪范成之 李君德湯君
白攜命書來 燒玄壇紙 宗壽卿來言來日有人歸鎮
江付家書 晚見張德輝付申狀

初五日陰 飯後到省中禮房同張德輝見馬外郎楊典付
申狀 午同小王覓舟到北新橋覓方仲明不見空費船
錢壹貫二百五十大雨作只得急回 晚見德輝於省前
到龍舌頭西去濠沙坑見馬從簡敬外郎言乃事未允
所請 回見德輝云來日當爲著語卻不必出也付後司
使用 吳菊泉見過夜話 省中遇賈州判

初六日雨不可出 寓杭 吳菊泉攜紙二幅求書 別歸
德清付陳有之教諭紀事 見湯北村 次見張晴川

見趙子昂不遇見趙仲時 見陳無逸不遇乃弟陳正一
相接 湯君白來同出見李君德留茶 訪羅康伯不遇
晚見張德輝 儲叔儀隔河樓上見呼出紙索書具酒
晚飯

初七日雨 客杭 到省中見張李二兄 李君德湯君白
來攜紙索書就送紙一幅訪吾子行求篆字閑話久之惠
印色方 路遇胡石塘儲叔儀相招五盃午麪坐客焦君
用尹子源余及陳外郎主人飯罷焦公買紙求書 晚見
張德輝令來日見馬公 路遇范君用

初八日雨 客杭 早拂曉伺候馬外郎未從所請其意已
諾之矣 見張德輝於省中 游淨慈寺禮佛看羅漢五
百尊訪朱敬齋 張德輝來同出見唐仲文不遇 次見

廉司書吏趙潤卿汴梁人也曾湖州路吏韋其之回路德
輝待羊飯 訪莫知事路遇聶通父兵房 上中山教授
來

初九日喜晴 客杭 早見鄭鵬南廉訪 次會柯以善以
善留三酌劉悅心張景芳寫篆字上秀才續至上杭人吾
子行之高弟也 到省中是日眾官爲別不花平章送路
不聚 訪吾子行不遇 訪湯北村亦出 訪張晴川于
崔進之家 訪張德輝 儲叔儀以今日登舟還義興相
呼午飯出紙求字會焦君用 路遇井同知蓋爲后降香
作使來杭 盛親家章端甫自鄉中來寄至家書拉同市
樓小酌大街問茶 燈下自官巷歸分路 尹子源請薦
海蜆話至二鼓

初十日陰 早見鄭鵬南廉訪 見柯以善 到省中 盛
親家見借鈔一笏以今日歸不及作別 張仲美湯北村
來值出 李君德湯君白來求書 鄉人趙翔甫求字本
晚再到省中伺候吏輩 到新宮橋見井同知浼於郭
都事處著語 晚方仲明尊舅來留宿

十一日又雨 溼熱 早湯北村招早食坐客方仲明宋與
之父子同方舅到省中見張德輝會新市陳副使省前具
茶 是日李叔毅著語馬外郎吏房 次同方舅見高國
良司丞 次同到下馬婆巷見李君實新授宜興都目茶
罷方舅拉往新門具麪 路遇宣州胡則大梅主簿汝說
趙祥甫來 晚見馬公猶未慨然 次見德輝急步而
回汗流溼衣幹事未成殊焦煩也

十二日 客杭 早到省中換劄于候押 朝天門訪張雲
心州判留坐具午酌薦糟鱗雞麪坐閒雨作取傘乃回
再到省中 路遇劉希聲 胡則大來值出不及相會
晚雨大作 張德輝送紙來寫刷卷宗目至二更乃辦
十三日雨 客杭 到省中 趙翔甫送果子求字本 尹
子源具午酌

十四日又雨 客杭 到省中 遣王二到湖州幹事作趙
文卿陳有之書 訪湯北村吾子行張景芳 尹子源待
午飯同出問茶 會溫長卿金沙人也 路遇王敬臣常
州路司吏 見唐仲文不遇 張景芳送紙求書吳興盧
徹道人詩偈道人費氏景芳之曾祖母

十五日 客杭城施水坊橋沈六郎樓 雨作不可出 陳

無逸教授來 朱敬齋山長來 張德輝外郎來 尹子
源呼酒過余寓樓酌之德輝去後于原具午飯蓋遣王二
之湖州客中乏僕故耳 李君德來 趙祥甫來 先妣
憫忌日

十六日又雨 寓杭 張雲心遣僕寄書來雨中約相過彼
此客况蕭索耳 吳若遺招午麪 到省中伺候吏輩
方仲明來雨中拉出見高國梁說假借事 赴若遺之約
坐客朱澄齋提領史元輔道判 是日若遺他出令水
邱養直相伴 訪王眉叟提點不遇 晚見德輝 次見
馬生未允所請 回再造德輝家 方仲明舅來留宿具
晚酌待之子源同

十七日晴 客杭 早同方舅早飯 見張德輝晚寫吏牘

方舅拉出見高國梁會李君實 路遇王君澤邀茶君
澤來日之鄉間託寄聲 王二自湖州回 路遇賈景顥
紀群甫周謙甫 李伯玉來 李君實來 鄰樓尹子源
得財賦府文書了辨可喜予滯留日久所幹未就愈覺憂
悶耳 遣王二到省中問話 李君德湯君白來張德輝
續至 晚尹子源燒紙招夜飲坐客余及沈咸之沈國寶
沈六郎父子 夜與張公抄文字

十八日晴 客杭 早到開元宮見王眉叟提點不遇徒弟
徐雲谷相接會吳江張景亮州判謝退樂府判景亮師道
學士之長子也時問方蒜山體任事 到省中本問乃事
楊生云今晚可見馬公 聶通甫拉入兵房出紙求書四
幅會湖州韋共之 次見叔義德輝 到小堰門回謁張

仲美知事不遇過王師善之姪 是日游大般若寺寺在
鳳凰山之左卽舊宮地也地勢高下不可辨其處所 次
觀楊總統所建西番佛塔突兀三十丈餘下以碑石贊之
有先朝進士題名并故宮諸樣花石亦有鐫刻龍鳳者皆
亂砌在地山峻風寒不欲細看而下 次遊萬壽導勝塔
寺亦楊其姓者所建正殿佛皆西番形像赤體侍立雖用
金裝無自然意門立四青石柱鐫鑿盤龍甚精緻上猶有
金朝銅鐘一口上鑄淳熙改元曾觀篆字銘在皆故物也
行至左廊記得壁上一詩云玉輦成塵事已空惟餘草木
對春風憑高□□□□目斷蒼梧夕照中寺門俗云望
江亭俯視錢塘江水大略與揚子江同但隔岸越山蒼翠
差勝耳遠見西興渡口煙樹如薺 次遊新建報國寺行

至殿後有塊石僅留二十餘字僧爲別立一木牌云五十年前理宗夢二老僧日後二十年乞一住足地恍然夢覺今築地得此石卻無年代可考昔梵剎爲王宮今茲復爲梵剎如波入海以予觀之亦好事者爲之也且朝代之廢興皆天也二僧入君王夢中孰記而傳之耶浮屠之說妄矣傍有二客相與一笑而回 訪賈景顥不遇 張景芳

來取詩卷去賈景顥續至 晚見馬生 次見張德輝

遣小王下長安盛親家處借錢 路遇宋春卿石剛中

十九日晴 客杭城 早到省中見楊典 三橋早飯飯已

見吾子行寫篆字相送仍取玉簫爲予吹數闕子行隱居不仕時能道滑稽語亦近來罕有 同李君德訪崔進之索小楷碑文回路君德邀市飯 再到省中乃事小見次

第 晚見宋春卿郎中索根腳抹子

二十日晴雲 客杭 早見宋春卿與根腳抹子 到省中

見馬公登吳山城隍廟壁畫二鬼頗得回立門首左顧西
湖右視大江杭郡人家皆在足下 次遊玄妙觀門立徽

宗御書碑石殿前立高宗御書道德經石刻經幢二亭覆
之後有眞武觀記開平二年物也有老道士云吳越時已
有之昔爲紫極宮惜前朝碑石有天慶觀字皆鑿去不存
殊失古意且朝代更改敕額曰玄妙當存其已往而新其
方來可也道士俗物大敗人意回到省中石路高下足力
少倦 湯秋巖通判來約尹子源同到旗亭沽酒酌之
湯君白引張伯愚來攜扇十柄求書李君得後至 張菊
存來 是日日本司文書有好音爲張士瞻者阻之令人敗

興乙巳日

二十一日晴 客杭 尹子源辭歸金壇 到省中未見書
卷次第而歸 湯秋巖來邀飲紅酒次送秋巖至蘭陵坊
分路 張景芳送照元除劄子來路遇陳如心教授 開
元宮見王眉叟會張景亮及二羽客 訪宋春卿郎中會
臧魯山廉訪秦彥立外郎 名植 省中選房之本把也 方
仲明寄紙求書畫情緒不佳更遲一二日下筆 燒玄壇
香囑告乃事 省中遇李君實王僕之

二十二日晴 客杭 到省中馬生以張郎中未允所請故
爲託辭會夾谷郎中送照元除劄子下架閣庫雷毅夫收
見李叔義 胡則大來 湯君白來同到府學見李鑒
峯教授 次見張晴川 次見湯北村會韓竹閒 路遇

毛海雲山長 孫周卿來同僉公之姪也 路遇王仲可

晚香

二十三日晴霧 客杭 省中假日 早冒霧到馬婆巷見

李君實託馬惟良見張士瞻說話 次到省中見楊典損

見謝暉照會 到寶祐坊佑聖觀橋西同謁胡則大不遇

張景芳來 鄉人盛壽一官人相遇爲高子西在此子

西病瘡同見湯北村問藥不遇回路盛兄邀小酌 湯北

村胡則大張景芳來 晚盛壽一哥約飲于欽善坊

二十四日陰 客杭 早到省中 次到儒司見金君玉問

白无咎禮任月日 湯北村費謙夫來費公鄉人也年六

十三 再到省中架閣庫見雷毅夫爲照元除事 是日

解后郭千戶夾谷舍人王仲可相拉到朝天門酒家午飲

坐客大名入三都目皆軍中掌案牘者獨程其姓者通文
湯君白來燈下同到官巷問茶 再到省中囑楊典
二十五日晴 客杭 早到省中解后孔良甫楊廷秀胡宗
伊李景仁 再到省中架閣庫 訪宋春卿不遇 訪湯
君白借典章 幹事未就而同遇蘇淳齋杭之善醫者也
約市肆小飲 同謁王仲可不遇 路遇田管勾今爲泉
府院令史在都下時曾同寓云

二十六日 客杭 早重霧 中見唐仲文不遇爲長興欠
俸囑呈文催討 次見宋春卿會江陰李外郎春卿出紙
四幅求書 盛親家公自長安來同西盛壽一哥及二鄉
人相訪 到省見馬生催促之到架閣庫送吳令史使用
紙錢 見李叔義訪王眉叟 盛親家約到芳潤橋午麪

壽一哥同集 晚又到省中囑馬楊二生 李君實來取
字去報馬維良已見張士瞻說訖商量甘結 晚見德輝
不遇 夜香

二十七日 客杭 到省中伺候書卷已完馬生改抹但咨
省而已令人恨口再囑馬生不允 見張德輝 盛親家
來別付家書報事體如是 晚見馬生云非不用力首領
官不從奈何欲退元物不曾收 再見德輝 見湯君白
同見李君德借錢 歸家悶甚奔走兩月今日壞盡

二十八日 早見唐仲文囑俸事 次見宋春卿會李士可
同二公游開元宮次到寓所其茶二公更欲相攜余以事
不如意舍之而別 李君德來 問卜 再到省中見楊
生令稍遲一二日 見張德輝論乃事 訪賈景顥不遇

訪郭總管不遇會李齊賢 又見德輝值出 晚燈下

坐久謀之無計更遲二日且往長興索俸作歸計耳

二十九日 霧中早見唐仲文不遇 到張德輝家 到西

倉橋見方仲明 到省中別李叔義 張晴川來值出

晚作家書發王二來日歸

三十日晴冷 王二歸鎮江 出別張晴川崔進之柯以善

吾子行 湯君白知余事不如意呼舟過湖閑行散悶游

南山惠因華嚴寺次游開化院次遊石屋洞俯視洞口深

暗不可測覺陰風逼人壁上記姓名而回 入勝果尼寺

與石屋相對君白令親惟德母子爲尼延坐設茗罷次游

水樂洞扣寺門久之乃得入遶寺皆奇石門有亭扁曰聲

在寺後口泉滴洞中相應鏗然有聲故名亭有石刻坡翁

東陽水樂亭詩觀畢而下踏石上黃葉攀徑邊古松山林
閒自有一種清氣借筆題云至大元年十月三十日京口
郭天錫同湯君白來此聽泉寺僧具茶飲之清甘卽此水
也更過一二僧寺以心緒不佳不及詳記泛湖而還西北
風起同君白錢塘門小酌分路 見張德輝 路遇黃明
叔

十一月初一日 辭吳若遺不遇會王介叔朱提領 李君
德湯君白來同出到君白家具茶路遇鄉人孟子長晚別
張德輝德輝具酒會丘中山杜器之宋口口李仲雍歸已
盡醉

初二日晴 客杭 到省中領文書取回甘結 同孟子長
見胡則大值已回宣城路遇鄭君祥宣史同茶 同子長

見吾子行就別 次別湯北村 晚見馬生了絕乃事

晚邀子長小酌囑照元除事 別李叔義

初三日 早別張德輝 同沈六郎買人事 午覓小舟至

塘頭下至西會橋見方仲明留小酌晚飯就宿於其寓

初四日晴 離杭州 早方仲明待早飯飯罷遣丁提控福

重般行李上航船遇杭人魏提領稽太醫同載 唐涇晚

飯 夜行

初五日 平明曉寒至湖州覓小舟由城外載行李寄于清

塘門人口口入苕城見陳有之 次到儀鳳橋解庫入息

到湖州路總管府口國祥不遇會康安道李仲立倪子

章趙子益 有之具酒小飲飲至日西有之送予出清塘

門上船遇長興州吏盧口甫有之再於市店具酒乃別登

舟夜行舟中人稀宛勝夜來之湫隘也

初六日晴 平明抵長興 見趙文卿父子 會李質夫留

早飯飯已同文卿見陳素心教授 次見孟雲心 次見

沈孤峯不遇乃子希古相接 次見陳繼之見周剛父不

遇 訪廣福寺琦伯玉講主留小酌壁上作竹石 錢梅

巖請席坐客陳素心予及文卿質夫酒散歇於趙文卿家

輔之具晚酌 夜閒輔之釀酒牀頭糟牀滴滴有聲

初七日晴 寓長興 早飯文卿相待郎晉卿亦至同食仍

贈米一升 同文卿出見安亭甫不遇 次見袁正甫陸

草窗 次見沈孤峯殺雞具酒仍約陳繼之共飲 路遇

張古愚袁壽卿 過口和父門留茶 早琦伯玉講主淵

古潭和尚來 陳素心潘吉父盧希顏賈德輝來值出

見欽察同知新授臨安縣達魯化赤 晚文卿父子待酒
酒盡拂牀而睡窗外風竹蕭颯可聽枕上意舊游又復二
年矣令人感慨

初八日晴 寓長興趙文卿宅 文卿待早飯 出謁李王
廟 訪錢英甫 訪劉巨川值出郊未歸 訪劉竹西

訪潘吉甫留素食五品蔬果甚整 欽察宣差來拉余過
廣福寺會陳素心欽察同予至其家仍約琦伯玉講主看
畫出唐本渡水僧秦太師物也觀音二軸小幅崔白蘆雁
武后眞餘皆下品漢銅挈壺一煮雁開尊朱雲軸續至其
飲至月上同伯玉歸已鍾動矣 文卿夜話

初九日晴 客長興 文卿待早飯飯罷同出見沈孤峯囑
知州處說俸事時陳有之自湖州來共茶 謝欽察宣差

會傳子壽說全真道教呂知州朱僧正續至二公去後欽
察公留酒午飯飯罷同游廣福寺陸艸窗劉巨川亦至琦
伯玉一茶而別欽察上馬後數客送予歸 陳繼之相約
不及赴 沈孤峯陸草窗蹇成子來值出 晚文卿待酒
具飯 送詩與孤峯伯玉

初十日晴風 客長興 陳繼之邀早飯同文卿往赴坐客
沈孤峯陳竹溪予及趙文卿陳有之不期而會者陳素心
居首坐飯罷已亭午矣有之相拉見孟雲心 次見陳教
會蹇成子 次陪有之希顏出東門散步游沖真觀歷歷
皆舊遊處 回路有之買肥驢肉沽酒共飲飲散自麒麟
坊轉大雄寺前歸踏黃葉簌簌聲見一二小童拾墜樵於
古松下不勝故山之思晚已醉飽文卿自食白粥余撚炒

豆相與其話就以賈景顗所惠範圍數爲文卿贈

十一日晴 寓長興 呂知州送紙求書畫 劉九舍人來

陳有之盧希顏後至茶罷陪有之五峯炷香 文卿待早飯 午赴劉九舍之約坐客余及陸草窗食五品 欽察宣差約食水花傅子壽同坐閒錢茂卿外郎來尋李令史云云押過催俸關子矣 嚴君壽來值出

十二日晴 客長興 早寒 文卿待酒早飯 見安亨甫

同出見劉元履託語知州公爲俸事 次同亨甫到寓所

欽察公遣人相請閑話於大雄寺前人家時亨甫亦在

坐話已亨甫拉至其家具午酌 醫學沈教諭來 陳素

心相約不及赴蓋爲劉九舍陪話故也 同沈教諭禮不

遇 路遇錢君愷吳提領 次見周道副希顏同行

十三日晴 客長興 文卿待早飯 盧希顏來同出東門
閑步 次入冲眞觀畫壁一堵周道正具小酌 希顏相
拉見孤峯同孤峯見呂知州不遇乃子呂舍相接茶罷孤
峯拉至其家小酌回路欽察宣差留茶至月上得歸 朱
半山僧正來值出 陸關長皇甫懋官來亦值出 文卿
待晚飯燈下和陳教詩 施若虛來

十四日晴 客長興 文卿待早飯飯已寄蔣介卿書 同
文卿見沈孤峯爲俸事 欽察宣差來請至廣福寺會琦
伯玉傅子壽 同謁嚴君壽不遇 次訪孟景先三勺孟
雲心亦至同出同謁施若虛道士若虛約登市樓小酌倒
澆麪 同謁董子順會陳中美出門遇趙輔之同歸

十五日五更長興州學拜殿會呂知州詹提領蒙古李教授

趙松岡沈孤峯吳堯卿皇甫雲村及諸學職公堂具飯
訪欽察公同出閑步回至其家出宣和御府黃居采雪雀
圖用雙幅絹畫角上添金龍長可六七寸圍葫蘆御書并
內府圖書二印雪樹數株疎律上下下復作二鵲鴿真奇
物也欽察公凡三次招往看畫獨以此爲冠耳又看破衣
呂公像陳尙書家物也及小幅宣和飛禽不敢斷爲真物
具午飯飯罷過劉祥甫藥肆切羊沽酒仍約趙文卿共飲
會司吏潘國寶 晚陸草窗來文卿具三酌 朱雲岫來
值出 訪包亨甫不遇舊曾爲鄰居者 呂知州送紙索
書

十六日晴 客長興 欽察宣差令畫史捫絹來求畫山水
安亨甫同鄭子固來相約到亨甫家具小集午麪 早

文卿待飯酒三行 見劉巨川取藤黃亨甫同往 次陪
亨甫訪武雷岩道士 嚴君壽來值出 李質夫請齋不
及赴 文卿待晚飯已飽不敢領 晚歸月上聞鄰家打
稻童稚徹夜唱吳歌不歇亦豐年氣象吾鄉則未聞也
十七日雨 客長興 文卿待飯 欽察宣差來索畫文卿
具酒待之 陳仲美來訴其親素心公不與齎發

十八日雨 客長興 劉祥甫來請早飯 省委官劇郎中
君相請於史氏廨院求書殺雞具酒會令史周謙甫飲散
寶 欽察公相拉訪孟雲心看畫次到冲真觀回路欽察公沽
酒買羊共飯抵暮以口送歸 吳長卿陳四官人來爲索
通事 安亨甫來 夜雨

十九日雨止苦寒 文卿具早飯陳繼之來相拉到其家見

王知錄具小集 夜大風 借陸草窗坡詩六冊客中讀

誦

二十日晴 客長興 飯後見沈孤峯爲俸事 次見欽察

公會朱雲岫出門遇錢梅巖相引欽察到盛瀆前人家看
羅漢一軸次到客舍觀予所作雙松雪澗圖次請琦伯玉
來看欽察公又呼畫師沈兄來看皆爲予起敬茶已乃別
復請沈孤峯同見呂舍人囑與乃尊知州說俸事會傅子
壽同孤峯歸過州橋解后陳素心孤峯□□到其家小飲
歸已及暮 路遇石子方

文卿有傳將產未下予用北
游所得之方抹之立產得男

二十一日霜寒 客長城趙文卿直學家 飯後同謁朱半

山僧正不遇 次見嚴君壽 次同孟雲心見王州判不

遇 文卿待午飯 次訪陳素心索俸會張月心 晚同

素心陸草窗趙文卿見呂知州于州後煖閣說俸事 次

訪陳伯祥留茶 許阿四米到學

二十二日霜寒 陸草窗來 王二自鎮江來文卿具飯飯

後攜王二出見孟雲心陳素心沈孤峯陳繼之下大人書

欽察公相攜拉雲心抱琴造廣福方丈沽酒具肴適費

德輝劉巨川皇甫孟一哥具酒於□□家相招辭之而往

領三君子之約趙輔之錢國寶同集集散欽察公又遣人

相拉至日暮行至廣福寺前石橋松陰之閒送欽察雲心

抱琴而還 錢梅巖送紙求書

二十三日 客長城 趙文卿具早飯飯罷買香燭弔費月

巖先輩 陳素心李質夫袁正甫來文卿具酒 陳繼之

來取字去 郎晉卿來□月梅亦至文卿具三酌輔之待

晚飯 路遇毛可齋

二十四日己卯晴 客長興 文卿具早飯趙口口求字

蹇成子喪其妾來乞米 陳元善來約文卿及予到其家
觀蘇漢臣孩兒四軸具酒三酌 沈孤峯請午飯 陳繼
之來約同赴孤峯之約坐客陳素心王知錄余及趙文卿
陳繼之趙達道沈希古

二十五日霧晴薄暄 五更文卿約打魚予以庚辰日不及
往 輔之待早飯 蹇成子來 訪欽察同知同出見李
君章於稅務之務官具酒時石子方者欠欽察錢怒欲及
之子爲解紛 次同欽察公到沈畫家會胡州錢春堂琦
伯玉講主後至同歸分路後伯玉拉入廣福方丈具午飯
出川紙求書心經 李二朝奉求經堂大字 錢梅巖求

三樂堂扁 陸草窗袁正甫陸關長三君載酒肴見過同
文卿共酌酌已文卿以新打之魚續盃陸袁二丈守朱墨
爲業物微而意實厚也惟有感激 錢國寶求書

二十六日晴暖 寓長興 趙文卿待早飯 出謝袁正甫
陸草窗沈孤峯陳繼之 送筆與劉巨川不遇 劉子敬
教諭相訪不遇行至州橋偶然解后拉具午酌仍約到西
溪 到李質夫家爲俸事留小酌蹇成子趙文卿續至就
以式鈔贐蹇秀才

二十七日晴暖 早張潤甫自杭來見報照元除已辦潤甫
景芳學正之子在行省選房寫文書與費德輝親 觀文
卿捕魚長興人水車用手挽不用腳踏 西溪劉子敬遣
舟相請以錢英甫相招不及往孟雲心來亦具酒相約展

至來日 陳素心相招坐客稅務提領呂大使金副使子
及趙文卿 晚陪陳趙二公赴英甫之招草草盃盤而已
至二鼓乃歸 周直學來 伯堅

二十八日風雨 客長興 謝文玉攜舊藏徽紙數幅求字
陸草窗陳元善來文卿具早飯 李質夫徐令史來

以謝兄紙爲雲心作古木一小幅爲琦伯玉講主書多心
經并煙江疊障詩 劉子敬以舟約往西溪顧風雨正作
寒氣逼人不能前也作書謝之 晚飯已燈下同文卿論
八門數 錢梅巖又以紙求書爲寫天寶諸王愛名馬詩
二十九日雨止 客長興 文卿具早食十盃會客陳素心
予及陸草窗湯儀甫袁正甫陳繼之盧希顏李質夫 李
質夫皇甫茂官送紙求書 新陽節至思歸故鄉不自由

也

三十日冬至節 客長興 早起燒香酬酒 到州學與士

友拜 先聖先師 公堂稱賀 陳素心拉至其家具小

酌朱半山僧正後至 同沈孤峯陳監鎮袁正甫盧希顏

沈希古賀呂知州三酌諸公去後呂侯獨留予看許道監

溪山漁樂圖上用宜和殿寶後有伯幾仲賓子昂三公題

李君章物也次觀漢銅爐一隻內有嵯字會白雲宗僧正

次賀沈孤峯欽察同知俱出 劉九舍相招坐客陳素

心傅子壽余及陸草窗劉梅南陳守中劉祥甫劉伯通劉

巨川及諸劉兄陸關長皇甫茂官九舍二令似 楊卿雲

王伯以詩來見值出 文卿待晚酌燈下對坐和陳素心

楊卿雲二詩

閏十一月初一日 客長興 雨霰不可出 陸草窗來見
教大衍數十有八變而成卦法 沈希古來相約午集
周剛甫遣人相招余已諾沈公之約不及往 錢梅巖董
子順來相約到子順家小酌領一盃而出 同草窗文卿
赴沈孤峯席坐客陳監鎮陸草窗趙文卿余及陳繼之沈
希古七人酒盡霰復大作 費德輝送紙求書

初二日陰 文卿享先具餛飩早酒趙二官人同集 陳繼
之請席 董子順來 陸草窗相招已諾繼之之約不及
往 同文卿赴繼之席坐客沈孤峯余及陳監鎮趙文卿
錢亨甫李質夫周秀才趙輔之酒未半雨雪大作見燈而
質夫輔之先歸主人行酒興正濃而鐘已動相留過夜眾
客醉帽欹斜狂歌盡醉鄉俗以冬至至元宵各家擊鼓謂

之催年鼓和歌諸老亦不自知手舞足蹈也至半夜醉眠
乃已孤峯方去終夜雨大作宿繼之書院文卿共榻繼之
所居地僻人稀四邊皆林木也

初三日雨 陳繼之留早飯三品坐客陳竹溪趙文卿余及
錢亨甫飯已冒雨而歸 陸草窗折簡相招午集雨中同
文卿往赴其約劉巨川亦在坐草窗出示司馬溫公劉無
言真迹次又出紙求書陸天隨杞菊賦是集風雨中尊酒
論文至暮乃歸儒家氣味洞見其真率也 是夜風雨不
止簷外竹樹蕭颼有聲

初四日又雨 客長城 趙文卿待早飯 劉巨川送紙索
書連日諸公求書弔挂借艸窗坡詩一部其中絕句寫盡
無餘

初五日極寒飛雪 文卿待早飯飯已同拉質夫到學中見
陳教爲俸事可否久之開倉支米貳拾石陸斗欠四石般
寄于徐勝家 趙文卿公堂具三酌 復拉文卿到卞樓
小集輔之後至

初六日陰 寓長興 文卿待飯飯已出別安亨甫不起
次別袁正甫陸草窗潘吉甫劉元履劉巨川 路閒解后
孟雲心拉至其家作胡剃主人 次同雲心別欽察宣差
具酒午麪 別周剛甫

初七日晴冷 周剛甫具早飯相招六盃仍以生絹爲贄
陳繼之以紙六幅求書 陸兄 關長 來取字去就以詩寄
草窗 孟雲心以神仙手刻桶底蓬萊圖見惠 同謁繼
之不遇 陸草窗攜紙四幅求書龜蒙詩

初八日霜寒水凍 文卿具早飯見沈孤峯會白雲宗圓提
點陳繼之孤峯留小集午飯 次同繼之到學中爲餘欠
米事忽齋僕姚壽者抵觸陳教又與陸慶致爭本官正怒
勸解乃已不及白其事也 晚繼之復約孤峯及予到其
家飲酒晚不可歸同繼之踏月送孤峯過濠上歸是夜宿
繼之家寒夜不寐

初九日 早起燒松明火 繼之具早飯飯已同出尋李質
夫 寫批子一紙次同見陳教覓印押發付姚貴下尙吳
卿催欠自學中同陳教出至太平橋李學司與陳老喧爭
余與繼之解紛散歸 潘吉甫送茶以紙十二幅求書
畢君舉袖紙八幅求書 錢炳之求梅巖古溪大字古溪
李二朝奉之雅號也 文卿具午酌陳繼之李質夫同集

初十日 寓長興趙文卿直學家 文卿具早飯飯已到州

前解后欽察同知同到姚子和藥鋪其茶茶已恐其留連
誤耳遂別歸 約趙文卿李質夫趙輔之小集至暮乃已

十一日霜晴 董子順招早飯食五味同趙文卿往赴 陳

教者以呈文白呂知州拘收已還俸米知州云汝既親自
開倉與了卻教我作惡人卻之弗受 陳教來趙文卿及

余問及前事太興喧爭卻無語答後同文卿以乃事白之
孤峯元履草窗三公皆不以爲然 錢梅巖攜魚酒見過

邀余及文卿質夫子順共酌 小王上湖州雇船

十二日晴 文卿待飯見欽察同到王二官人家見李入塔

赤相士劉心月呂舍人傅子壽 欽察在彼蹴鞠 午後

船到 遣徐貴再白陳老下米於船中

十三日陰 客長興 文卿待早飯飯已出見沈孤峯約同
別呂知州 陸庭翠來見攜紙四幅求書董子順後至文
卿具酒共酌 同沈孤峯別呂知州父子不遇 次同到
州治作別知州舉乃事予對眾分辯呂無語可答孤峯相
拉到其家小飲 是日訪孟雲心出示黃居采萱草湖石
蝶猫二軸蔡月卿物也黃氏父子作石用筆橫拖少作闊
子俗謂之野鵲翅

十四日 早文卿具酒食五品爲余酌別仍約陸草窗共飲
沈孤峯續至送贐禮 訪周伯固道正具小酌湖州吳道
士後至 路遇嚴君壽就別 是日滿擬登舟文卿父子
相留來日作別

十五日五更束裝賦歸 文卿賢夫婦作別待早飯已文卿

送至溪邊上船 李質夫遣小童送鱸 早離長興午過
呂山下松竹蒼翠前一橋曰甫里橋人言是陸天隨隱處
詩家醞藉猶可想像也 晡時至湖州舍舟由西門入城
幹事 晚宿東門外 有一白雲宗僧來趁船至平望云
是儒家子亦可與語

十六日 早發東門午過南潯 震澤 晚抵平望已昏黑
矣

十七日 早發平望西北風大起過太湖塘岸巨浪濺水入
舟掀舞可畏 午後至吳江州見本州教授方蒜山尊舅
時爲開讀他出見方五舅母令似仲思 儼相接就手三酌
辭之登舟 晚宿平江闔門外

十八日 早發平江 午後抵無錫城河中米船塞擁舟子

雪山正言卷一
喧爭至昏黑方得通行就泊無錫州門外

十九日 早發無錫 舟過毗陵東北風大作極冷不可言
晚宿新開河口三更舟蓬浙浙聲乃知雪作也 五更
月復明

二十日苦寒 早發新開河舟至奔牛堰下水淺不可行換
船運米至呂城車堰方辨船上篙櫓皆堅冰也舟人畏冷
強之使行泊柵口

二十一日 早起衾裯如水潑堅冰四合舟不可行 至午
喚舟子打冰風復大作凡避風處冰不可開迎風處爲波
浪捲冰丁東作聲岸下聚冰高三二尺行至丹陽催行至
石羊子鋪口住舟就泊蓬上爲冰水所濺皆如懸挂琉璃
然

二十二日晴 冰厚舟不可行滯留不發 遣王二步路先歸 泊舟處皆村民米船悶坐竟日

二十三日晴 舟中午前家閒發馬來接晡時抵舍 拜親以上出路計九十七日

二十四日晴 張和甫來金沙老儒 大人赴滿提點席歸同王石溪房春谷王表白到舍下晚酌春谷近歸自燕京新授揚州道司知事

二十五日晴 佃戶劉七二攜豚躡來見 陳舍人來以細茶一合與之 出見滿提點錢學錄石民瞻盛季高龔子中房春谷俱不值 見米起卿亦出 見李仲傑提舉會李和之太醫梁宣使 同謁張和甫 侍親登甘露寺長老本無傳相接先于方丈小酌次登多景樓具麪僧司吳

令史亦在坐 石民瞻錢深之來俱值出 晚袖香弔盛
親家母蔡氏

二十六日晴 出見錢深之 次見王師善會陳茂叔錢深
之楊以吾 見趙心甫會堯葵軒父子 章子實來李行
簡後至三酌 石民瞻來 晚同四哥見普照本宗主
蔡宣使令似來

二十七日晴 陳茂叔來 陳靜齋來 朱良卿來 王思
善來 楊有之父子續至留午集仍約錢深之共飲

二十八日晴 盛季高來季山泉亦至 蕭景玉來趙心甫
續至 孟子長張學生來子長報省中選事 邢竹堦來
二十九日晴 出同謁陳茂叔孟君澤會明光甫 見聶知
州不遇 同四哥到市閒買物 章子實來陳菊田續至

蒙古謝學正來 孟君澤陳景南來值出

十二月初一日 五更列排香案具羊酒紙燭謝眾神蓋去
歲往北時所許者 請盛季高午席 余友梅朱信庵來
會客石民瞻趙心甫王思善錢深之盛季高

初二日晴暖 燒紙 出還聶宅器皿 回謁余友梅朱信

庵茶罷余繼善邀湯彈琴 回謁陳靜齋 會徐彥翁

訪堯葵軒 訪潘庵主 本宗主來 回謁邢竹埜陳景

南俱不值 回謁房晦叔會房共辰

初三日 盛季高來相謝留以酒 同四哥見錢深之於客

樓待酒張和甫在坐 次約孟君澤見新任趙提領不遇

登城隍廟抽籤吉但遲遲耳再扣北方之信卻好 見

陳茂叔 次同見東高千戶不遇 見陳和甫出門王宜

之舍人相留傾酒五青鍾 晚見章子實子實留小酌

初四日晴 同四哥乘馬到墳所 次遊雲臺寺闐然無人

次到蘆灣 次到焦山莊經都管三酌自定波門外汝

山下沿江而同是日暖如二月閒在家兀坐無味駕言出
游以寫我憂耳 張和甫來

初五日陰 約章子實午集 陳東村張和甫來 章子實

李四乙郎來赴招

初六日晴暖 章子實來謝 蘇知觀來袖馬裕齋書數紙

來看 侍親到墳所

初七日晴 同三哥送書與施公恕 次見郭元吉 次回

謁蘇知觀 次回謁蕭景玉會胡舍人 次訪錢深之

陳行之舍人相邀余兄弟三人小飲薦臘雞

臘八日 祀先 陳夫人借米 房晦叔來

初九日晴 房文一官人來爲乃妹不告而出事 陳行之

來陸靜居同其姪

文富來

初十日晴 堯一哥來借轎爲人所先不敢諾其請

十一日 王時中自高郵來同出到府中不聚 次見劉倅

亦出 午閒邀時中午飯 俞景仁來 連日暄如二月

閒 發書與曹舜咨回舟

十二日 袖香到下河頭船中弔顧三朝奉就慰其子子靜

知事 龔子中趙心甫來 房晦叔陳菊田來爲一郎事

回謁俞景仁房晦叔朱良卿會相舍人 房文一官人

來

十三日 早送顧朝奉殯出西門 章子實來 見陶提領

乃子問關文事 次見章子實會於于公右之樓戈君讓
盛子中同茶 到丹陽館前見湯秋厓府判 回謁龔子
中會李行簡 陳茂叔來酌之

十四日 送關文與王思善會湖州趙仲山朱正甫 李行
簡來

十五日 早到路學殿謁 本宗主遣其徒來請到龍華會
寫修造寶塔疏二軸留茶果午麪

十六日 早長興丁君耀齋吳長卿書來 同仲方弟覓小
舟下金壇湖溪風特甚天欲飛雪 夜泊珥村

十七日 早發路遇庾祥甫鄭翔遠蓋爲催運官糧偶然相
遇耳 抵金壇縣令弟入縣分付喚鈕佃討租 午至湖
溪歇行李于趙宅書院見王敬仲敬仲令景明長子吉官

相引到劉仲明宅上方見趙景明解后張仲方山長劉公
留酒飯與景明同歸又飲我以酒忽報王直溪到此同入
書院見之夜與仲方山長對榻

十八日 寓湖溪趙宅 早景明具飯刲羶坐客王直溪張
仲方余及趙五官人王敬仲仲方弟叔已隨漢上船 午
閒張仲方亦去 劉仲明來景明于書院火閣內具酒仲
明出紙求書傳盃直至燈上景明諸子姪及王敬仲趙伯
高又具蔬果籠炊來客房夜酌

十九日陰 寓湖溪趙宅 早趙東湖山長自宜興篠塢回
拉余入書院早飯飯罷請景明到客房說話未畢劉仲
明來同東湖及舍弟游僧庵登諸天閣次遊敬親道庵新
開一逕遶長蕩湖邊頗覺軒豁遊回仲明邀至其家看所

藏書畫官密磁器古銅小餅次入筵坐客趙東湖余及李
和甫鄒提領趙景明王敬仲仲方弟東湖酒半取青青子
豪飲抵暮乃歸再與景明卻酒夜話王敬仲亦在座閒
趙伯可自宜興歸未見

二十日雨作 寓湖溪趙宅 早與景明說話 午閒東湖
開宴坐客劉仲明余及趙五官人王敬仲東湖景明仲方
弟

二十一日 寓湖溪雨止天色未晴 東湖昆仲約入書院
商量聘儀數事 劉仲明相請過其家出思陵御題乘鸞
女小米山水趙子益水仙梅花手卷求詩具早飯飯已趙
景明亦至劉宅諸子姪求字本是日欲過長蕩湖以風雪
不可仲明以食米爲贐辭上縣中 劉君用相留過午開

花園看梅求作竹石及愛梅大字羽士董生求寫疏頭復
入東湖書院午酌將仲仁同集至暮乃歸趙會江方叔令
似 是夜雪大作

二十二日 寓趙宅雪作 東湖昆仲具早飯二十五日乃
東湖壽日意欲相留余以上路日久堅辭不許願風雪如
許只得更遲一日也東湖索壽詞卽席賦之 晚飯已東
湖與蔣如愚圍棋余先出 景明具酒肴來客房雪夜共
酌仍約王敬仲同集二子亦在坐傍留連至三更乃已
是日景明翦絹一疋求書扇面趙伯可亦求書

二十三日雪晴 早飯已趙東湖父子相留之心愈堅余以
歲除在近且事有未就者別之登舟趙景明獨送至溪邊
仍再囑乃事 泛長蕩湖半日整遠望村落雪樹相連接

雖覺清致然寒氣亦不少愆也抵水北已日西矣 見曹
本齋時乃弟舜咨山長之杭其子彥高彥良彥實彥博俱
相接 是晚集五盃館客范謙甫同飲 風雪

二十四日雪止 寓曹宅 本齋待早飯飯已彥高備馬同
仲方弟遊集仙觀訪史道山不遇壁上鄭子實畫松一株
根生石上彥高命予作竹石相對頗覺稱手羽士路松隱
留三酌 訪曹愚坡亦出 次同仲方弟看鍾呂二仙像
併殿上水壁上馬而回 本齋待夜飲范謙甫共酌

二十五日 雪意未已 寓曹宅 本齋待早飯飯已欲出
以雪泥載道故止之 晚集于曹公穿堂坐客范謙甫子
及口道士仲方弟曹彥高

二十六日 雪作 寓曹宅 本齋待早飯飯已彥高彥實

同出游花園 晚刻曹彥高彥良彥實彥博四昆仲待酒
過集仙曹愚坡待五酌

二十七日 雪大作 寓曹宅不可出 曹兄昆仲出紙求
書本齋待飯 晚刻諸弟兄相伴傳盃至半夜窗外雪竹
一林壓倒欲折彥博善吹洞簫令作數曲送酒亦自不惡
二十八日 雪小止 顧四望無路 本齋云雪深如許君
將何之只得更留然歲且盡寄食于諸公家自覺無意耳
是夜彥高昆仲燒雞具酒飲至二更謙甫同集

二十九日 本齋具早食食已借馬二乘賦歸主人堅留不
許予以新正還舍有親在堂不容不動身也既上馬莽無
歧路踏冰而行午至金壇縣中次行至珥村僕夫有倦意
晚抵橫塘並無宿處而馬料亦無僕夫損足不肯行有土

居趙四官人者設肆壺酒相留一酌宿路途中亦難得者
三十日 早踏雪發橫塘 次抵丹陽縣下馬見步德二官
人時充水馬站吏取馬草喂馬相留早飯 曹公二僕強
之不可行且有怨色發馬遣回以錢贖之河冰無舟次踏雪泥
自丹陽覓人夫擔行李余與弟步行而歸不勝勞苦余嘗
遣童僕出路每遇雨雪輒責其緩蓋不厭此境則不知也
抵暮至仁和門外房清夫家覓湯洗足喚馬而歸清夫留
三酌 除夜香燈甚整足倦而睡不及往看終夜足痛